

Սոյն պատասխանագրին հասնելուն յաջորդ Հինգ-
 շարթի օրը (17 Յուլիս) Ս. Աստուածածնի եկեղեցիին
 մէջ ընդհանուր ժողով (սիւնհոդոս) կը գումարեն, ուր
 ներկայ կը գտնուին Սաչատուր Աբաստացի, Մարտի-
 րոս Ղրիմեցի, Ղազար Ստամպուլցի և Եղիազարի ա-
 շակերտ Իգնատիոս ու Կիրակոս վարդապետներ, Սիսի
 միաբան Սաչատուր եպիսկոպոս և Կ. Պոլսոյ իշխան-
 ներն ու ակադեմիկոսները: Ժողովին մէջ կը կարգան
 Յակոբ կաթողիկոսի թուղթը ու կ'ըսեն. «Մենք բոլոր
 վարդապետներս քննութիւն կատարելով վերահասու
 եղանք Սուրենցիի չարութեան ու արժան դատեցինք
 նզովել զայն և լուծել իր վարդապետական կարգէն
 ու քրիստոնէութենէ նոյն խակ, բայց չըրինք այդ բա-
 նը, ու անոր արարքները տեղեկագրեցինք կաթողի-
 կոսին, որ ինք բանադրէ ու կարգալուծ ընէ զայն:
 Կաթողիկոսը, սակայն, առ ոչինչ համարած է այդ ժո-
 ղովը ու մեր թուղթը, որուն ներքև կնքած էինք
 բոլոր վարդապետներս ու վեց ակադեմիկոսները»: Ու
 դատաստանով սա վճիռը կու տան. «Որովհետև կա-
 թողիկոսը մեզ կարևորութիւն չտալով այսպիսի գիր-
 մը զրկեր է, ուրեմն անիկա այլևս պէտք չէ մեզի, ու
 այսուհետև անոր անունը չյիշուի պատարագի մէջ»:
 Այս վճիռին համաձայն՝ յաջորդ Շաբաթ օրէն (19 Յու-
 լիս) սկսեալ կը դադրեցնեն Յակոբ կաթողիկոսի յի-
 շատակութիւնը ու տեղը Ս. Լուսաւորչի անունը կը
 յիշեն:

Այս կարգադրութիւնը գիր չի գար Եղիազարի
 հակառակորդներուն, որոնք կարևորութիւն չտալով
 ժողովի որոշման՝ կը ստիպեն իրենց կողմի քահանա-
 ներուն յիշատակել կաթողիկոսի անունը: Եղիազար
 թէև անձամբ չի մասնակցիր յիշեալ ժողովին, բայց
 կասկած չկայ որ իր թեղադրութեամբ շարժած էին
 ժողովականները, վասնզի հոքէն երբ անաստող քա-